

## NATÁL NA’I NIAN – MISA MEIANOITE NIAN

### Tema “misa meianoite” Natál Na’i nian

Tema Eukaristia ne’e nian bele rezume ho espresaun “povu ne’ebé la’o iha nakukun laran haree naroman boot ida”.

*Leitura dahuluk* anunsia kosok-oan ida ne’ebé to’o mai, husi David nia dexendénsia, Maromak nia presente ba Povu, ne’ebé sei halakon kauza sira terus nian, injustisa nian no mate nian, no hahú tempu ida ksolok nian, laran-kontente nian no dame nian ne’ebé sei la nahas.

*Evanjellu* apresenta konkretizasaun promesa profética: Jezus, kosok-oan Belein nian, mak Maromak ne’ebé mai hasoru ema sira atu oferece ba sira – liuliu sira ne’ebé kiak no fraku liu – salvasaun. La’ós salvasaun ida ne’ebé impoin ba ema sira, maibé, salvasaun ida oferece ho laran-luak no domin.

*Leitura daruak* fó hanoin katak simu Maromak nia salvasaun, ne’ebé sai presente iha istória ema sira-nian liuhusi Jezús, signifika hakribi valór sira mundu nian, bainhira sira kontráriu ho proposta ne’ebé kosok-oan Belein nian lori mai.

### LEITURA I – Is 9,1-6

Testu ne’ebé apresenta mai ita halo parte ba “oráku mesiániku sira” ne’ebé atribui ba profeta Isaías. La seguru se ne’e testu ida Isaías nian, ka testu ida mai depoizde profeta nia tempu, ne’ebé editór finál sira integra iha mensajen Isaías nian.

Se Isaías nian karik, nia pertense ba faze finál profeta nia atividade nian (inísiu sékulu VII mK). Iha altura ne’e, liurai Ezequias, lakohi fó atensaun ba avizu sira Isaías nian, no kontinua halo jogu político internasional hodi halo aliansa ho Ejitu, Fenísia no Babilónia atu konsolida frente ida anti-Asíria. Profeta ne’ebé dezilididu ho iniciativa sira ne’e ne’ebé nia konsidera nu’udar abandona Maromak no tau konfiansa no esperansa, la’ós iha Jahwéh, maibé iha forsa estranjeira, hahú mehi tempu foun, lahó imperializmu, lahó funu, no iha-ne’ebé justisa no direitu mak ukun.

“Kosok-oan” ne’ebé haklaken iha ne’e, husi dexensdénsia David nian, bele mós iha relasaun ho “sinál Emanuel nian” ne’ebé profeta ko’alia ba liurai Acaz iha Is 7,14-17. Nia mak esperansa ba Povu atu lori mai justisa no dame.

### MENSAJEN

Atu haktuir tempu foun ksolok nian ne’ebé iha tempu futuru, Jahwéh prepara ba nia Povu, profeta utiliza ilas hanesan tempu ku’u ai-han ka ko’á trigu, bainhira Povu dansa ho ksolok ba ai-han ne’ebé naresin; ilas bainhira ba kasa no hetan balada barak, no kasadór sira fahe malu ho ksolok buat ne’ebé sira konsege kasa.

Tanba sá ksolok ida-ne’e? Tanba funu, injustisa, violénsia no opresaun lakon tiha ona no sei inaugura tempu foun ida, tempu abundánsia nian, dame no ksolok nian ba ema hotu. Sé mak responsavel ba “orden foun” ne’e? Iha Isaías nia linguajen, “kosok-oan ida” ne’ebé Maromak haruka ho misaun atu restaura David nia tronu, ne’ebé sei ukun iha justisa no lialoos (“mishpat/zedaqa”: liafuan sira-ne’e fó hanoin, iha linguajen profética, sosiedade ida iha-ne’ebé desizaun tribunál nian sai fundamento ba orden sosiál loos, iha-ne’ebé ema

respeita direitu hotu no iha-ne'ebé la iha fatin ba esplorasaun no injustisa). Título haat “kosok-oan” nian ne’e fó hanoin kona-ba Maromak nia título ka kualidade Maromak nian: título “*conselheiro maravilhoso*” selebra kapasidade atu hanoin hahalok kmanek sira no ida-ne’ebé Maromak nia atributu ida – kf. Is 25,1; 28,29; título “*Deus forte*” mak Maromak nia naran rasik ida – kf. Dt 10,17; Jr 32,18; Sl 24,8; título “*príncipe da paz*” lori mós ba Jahwéh, nu’udar “dame-na’in” – kf. Is 11,6-9; Mi 5,4; Zac 9,10; Sl 72,3.7. Kona-ba título “*Pai eterno*”, ne’e título ida liurai nian – kf. 1 Sm 24,12 – no título ida ne’ebé reinu ki’ik sira ne’ebé hakruuk ba faraó fó ba nia, bele haree iha dokumentu ka surat Tell el-Amarna nian. Nune’e, ita bele hare momoos katak “kosok-oan” ne’e mak Maromak nia prezente ida ba nia Povu no katak, Maromak sei horik iha nia Povu nia leet, hodi haraik ba sira justisa no ksolok ba nafatin.

## **LEITURA II – Tito 2,11-14**

“Surat ba Tito” dirije ba Tito ne’ebé Paulo konverte (kf. Tt 1,4), no akompaña apóstolu ba Konsíliu Jerusalém nian (kf. Ga 2,1-2), hela ho Paulo iha Éfeso no hafoin, ba dala rua, Paulo haruka ba Corinto ho misaun delikada, iha altura ida iha-ne’ebé Korintu sira kontra Paulo (kf. 2 Cor 7,6-7; 8,16-17). Autór surat ne’e nian mak Paulo, ne’ebé iha parte finál nia moris nian, entrega ba Tito Kreda Creta nia animasaun (kf. Tt 1,5).

“Surat ba Tito”, nia preokupasaun mak sarani sira nia komportamentu iha tempu prezente. Aprezenta tiha konsellu prátku ruma (ba katuas sira, ba foin-sa’e sira, ba atan sira – kf. Tt 2,1-10), autór surat nian buka tau práktika sarani iha fundamentu sólidu fiar nian. Ne’e mak kontestu ba ita-nia leitura ohin nian.

### **MENSAJEN**

Tansá mak katuas sira, foin-sa’e sira no atan sira (katak membru komunidade sarani tomak) tenke sukat sira-nia moris tuir referénsia sarani? Tanba Maromak nia grasa (“*kharis*”) hatudu an tiha ona mai ita, bee-matan salvasaun nian ba ema hotu. Nia hanorin mai ita atu hakribi laran aat no hakaran mundu nian, atu moris iha temperansa, justisa no piedade, hodi hein manifestasaun glória nian husi Maromak no Maksoin boot, Jezús Kristu (kf. Tt 2,12-13). Maromak nia domin – dala barak no ho forma oioin hatudu an iha istória – soi projetu ida salvasaun nian ba ema sira liuhusi Jezús Kristu nia moris, nia liafuan, nia jestu no nia mate no moris-hi’as. Projetu ne’e konvida ita atu iha/soi matan krítiku ba valór sira ne’ebé mundu propoin no sai sensivel ba valór sira Maromak apresenta, liuhusi Jezús. Simu projetu domin nian ida-ne’ebé no moris tuir mak modu ida atu hein, iha esperansa Jezús ne’ebé mai daudaun.

## **EVANJELLU – Lc 2,1-14**

Ita dúvida uitoan katak Quirino, nu’udar governadór, haruka halo resenseamentu iha époka Jezús moris (nia sai governadór Síria nian iha tinan 6 (dK- liutiha Jezús nia moris), maski nia bele mós fó orden atu halo resenseamentu ne’ebé lori efeitu prátku ba Palestina iha tinan sira entre 6/7 mK, altura Jezús moris). Maski nune’e, Lucas la hakerek “istória”, maibé halo teolojia no apresenta katekeze ida kona-ba Jezús, Maromak nia Oan, ne’ebé mai hasoru ema atu apresenta ba sira proposta ida salvasaun nian.

Ho indikasaun sira ho carácter istóriku, Lucas iha interesse atu situa Jezus nia moris iha époka no espasu konkretu ida, hodi sujere katak ne’ebé la’ós akontesimentu ne’ebé inventa de’it, maibé buat ruma integra didi’ak iha istória no ema nia moris.

## *MENSAJEN*

Indikasaun dahuluk mai husi referénsia ba Belein nu'udar fatin efetivu Jezús moris bá. Nune'e, Lucas sujere katak, Jezús mak Mesias, husi dexendénsia David nian, ne'ebé profeta sira haklaken (kf. Miq 5,1). Sai klaru kedes katak, Jezús nia moris integra iha planu salvasaun Maromak nian ba ema sira – planu ne'ebé profeta sira haklaken no Maromak nia Povu hein ninia realizaun.

Importante mós elementu sira ne'ebé define kuadru moris nian – balada han-fatin, laiha fatin iha ospedaria, hena sira ne'ebé hodi falun kosok-oan, sasin sira akontesimentu nian (bibi-atan sira): iha pobreza, simplisidade, frajilidade mak Maromak mai hasoru ema sira atu propoin ba sira projetu ida salvasaun no ksolok nian. La'ós projetu tronu ida aas nian, ho forsa kilat nian, osan nian ka komunikasasaun sosiál nian: maibé proposta ida ne'ebé to'o ba ema nia fuan liuhusi simplisidade, frakeza no laran-maus “kosok-oan” ida nian. Hanesan ne'e mak Maromak tama iha istória, hanesan ne'e mak lójika Maromak nian.

Ikusnian ita hateke ba “sasin” sira moris nian: bibi-atan sira. Sira ne'e mak ema sira ne'ebé ema hanoin nu'udar ema violentu no marjinál ka laiha importânsia, ne'ebé ho sira-nia bibi sira tama ema nia propriedade no koñesidu nu'udar ema sira ne'ebé foti ba sira-nia an bibi-fulun, susu-been no bibi-oan sira. Bibi-atan sira no publikanu sira ema tetu hanesan, hotu-hotu lahó kapasidade atu rekoñese sira-nia salan hasoru ema seluk, nune'e, lahó kbiit atu halo reparasaun ba sira-nia salan. Lucas tau sira nu'udar “sasin” sira ne'ebé simu Jezús ne'ebé mai iha mundu. Ba sala-na'in sira-ne'e mak Jezús ne'ebé mai sai “liafoun di'ak”, simu ho ksolok: salvasaun/libertasaun to'o ona mai; horiohin ba oin ema kiak sira, ema fraku sira, ema marginalizadu no sala-na'in sira hetan konvite atu integra an iha komunidade Maromak nia oan doben sira-nian. Maromak la hakribi ka hewai, maibé hakarak apresenta ba sira proposta ida salvasaun nian ne'ebé lori atu integra iha komunidade Aliansa Foun nian,komunidade Reinu nian.